

nem nullam tanto crimini prætexendam, & paucula alia, sed multa cum autoritate locutus, quæ viro militari pro facundia, secedere iussit, postridieque secum Dubliniam versus abduxit, inde in Angliam ad Reginam Elizabetham adducturus, ut pro arbitrio de illo statueret. Interea autem optima illa Princeps paulo postquam per nuntios acceperat (ne quid gloriæ suæ deesset) hanc rebellionem esse extinctam, quæ illam anxiam habuerat, in cœlestem patriam pie placideque emigravit.

Ita bellum Hibernicum, imo potius rebellio Comitum *Tir-Oen* ex privatis simultatibus ambitione intermixtis cœpta, contemptu principio & parsimonia ex Anglia fota, prætextu libertatis & religionis Romanæ restau-

randæ per universam Hiberniam diffusa, pravis Anglorum æmulationibus, veteranorum avaritia, subdolis Comitum artibus, & simulatis submissionibus, impeditissima locorum difficultate, desperato hominum genere magis pedibus quam armis tuto protracta; levi nonnullorum credulitate, & aliorum qui auctoritate valebant occulto favore, uno & altero eventu prospero, Hispano stipendio, Hispanoque milite confirmata octavo postquam eruperat anno, auspiciis Elizabethæ Divæ Memoriam, ductu Proregis Caroli *Blunt* Baronis *Montioy* (quem postea hoc nomine Rex Iacobus Comitum Devoniam titulo honoravit) felicissime confecta est, & pax, ut speramus, immota constabilita.

## H I B E R N I C O R V M M O R E S, V E T E R E S E T R E C E N T E S.

Hiberni-  
corum  
mores.



Ocus nunc postulat ut de gentis hujus moribus aliquid attexam, & attexam sane quod ad veteres spectat ex veteribus, quod ad recentes ex quodam recentiori scriptore cum doctum sedulo, qui hæc accuratissime adnotavit.

De veteribus Hibernicis cum illi ut reliquæ in hoc tractu omnes gentes barbaræ essent & immanes, hæc veteres prodiderunt.

Strabo in libro quarto: *De Hibernia nihil certi habeo quod dicam, nisi quod incole ejus Britannis sunt magis agrestes, qui & humanis vescuntur carnibus, & plurimum cibi vorant: & pro honesto ducunt parentum mortuorum corpora comedere, ac palam concumbere non cum aliis modo mulieribus, sed etiam cum matribus & sororibus. Quæ quidem ita referimus, ut fide dignis harum rerum testibus destituti. Sane carnis humanis vesci Scythicum esse fertur; idque usurpasse etiam obsidionum necessitatibus urgentibus Galli, Hispani, alique plures feruntur.*

Pomponius Mela in libro tertio: *Cultores inconditi sunt, & omnium virtutum ignari, pietatis admodum expertes.*

Solinus cap. xxiv. *Sanguine interemptorum hausto prius victores vultus oblinunt, fas & nefas eodem animo ducunt. Puerpera si quando marem edidit primos cibos gladio imponit mariti, inque os parvuli summo mucrone auspiciis alimentorum leviter infert, & gentilibus votis optat, non aliter quam in bello, & inter arma mortem oppetat. Qui student cultui, dentibus mari nantium belluarum insigunt ensium capu-*

*los, candicant enim ad eburneam candidatem. Nam præcipua viris gloria est in armorum tutela.*

Sed hæc vetustiora. Medii temporis mores sparsum Giraldus Cambrensis & ex eo alii: nunc autem recentiores ex recentiori illo viro studio habeo & suis ipsius verbis, qui nomine ut colligo I. Good, educatione Oxoniensis, professione Sacerdos, & qui juventutem Limirici erudit circa annum MDLXVI. Primum tamen paucis proponam quod modo promisi, de ratione juris administrandi inter mere Hibernicos.

Magnates, quorum nominibus quarta vocalis ob eminentiam & excellentiam præponitur, ut O-Neal, O-Rork, O-Donell, &c. & ceteri qui Mac præfixum gerunt jus suum habent peculiare, quo superbissimo vivunt dominatu & in subditorum fortunas tributis, exactionibus, pensitationibus militesque Gallogassios. scilicet, Kearnos & Equites quos alant illis imponendo ita pro libito grassantur, ut longe miserrima sit subditorum conditio, & quoties bella intestina inter illos ingruunt, succo & sanguine exhauriuntur.

Habent hi Magnates suos Iuridicos, quos ut Gothi suos *Bellagines* dixerunt, *Breahans* vocant, qui indoctissimum hominum genus statim quibusdam diebus edito aliquo & præcelso colle inter litigantes jus dicunt vicinis. Coram quibus actores queribunda voce injurias illatas conqueruntur, rei inficiatione negant; si manifesto in furto teneantur aut reddendum, aut multa pensandum pronuntiant. Habent etiam hi magnates suos Historicos qui res gestas

\* πρὸς ὅλους  
in Epiro-  
me, id est,  
Herbis ve-  
scientes.

O nobi-  
lissimorum  
nominibus  
in Hi-  
bernia ob  
excellen-  
tiam præ-  
fixum.

Breahans.